

BOSNA I HERCEGOVINA
FEDERACIJA BOSNE I HERCEGOVINE
TUZLANSKI KANTON
OPĆINSKI SUD U TUZLI
Broj: 32 0 St 467309 24 St
Tuzla, 24.09.2024.godine

Općinski sud u Tuzli, sudija Antonela Đaković, u postupku prethodnog ispitivanja prijedloga za otvaranje stečajnog postupka nad dužnikom DD „IDAC“ u mješovitoj svojini Tuzla, ul. Maršala Tita br. 71, pokrenut od strane povjerioca Malokas Ranko iz Tuzle, ul. Maršala Tita br. 62, zastupan po pounomoćnicima Mirsadi Božanović i Tatjani Gajić advokatima iz Tuzle, dana 24.09.2024.godine donio je sljedeće:

R J E Š E N J E

POKREĆE SE PRETHODNI POSTUPAK radi utvrđivanja uslova za otvaranje stečajnog postupka nad imovinom pravnog lica DD „IDAC“ u mješovitoj svojini Tuzla, ul. Maršala Tita br. 71, MBS: 1-314.

Za privremenog stečajnog upravnika imenuje Senad Uzunić iz Tuzle, ul. Izeta Sarajlića 5 C.

Privremeni stečajni upravnik dužan je odmah po prijemu rješenja o imenovanju preduzeti radnje utvrđene odredbom člana 63. Zakona o stečaju FBiH (Službene novine FBiH br. 53/21), a naročito:

- obezbijediti imovinu dužnika i starati se o istoj,
- ima ovlašćenja da uđe u poslovne prostorije dužnik i provede neophodne radnje,
- utvrditi da li postoji razlog za otvaranje stečajnog postupka,
- ispitati da li će imovina stečajnog dužnika pokriti troškove stečajnog postupka,
- utvrditi da li se poslovanje stečajnog dužnika može u cjelini ili djelimično nastaviti u toku prethodnog postupka
- uraditi kontrolu poslovanja stečajnog dužnika
- kada je podnosilac prijedloga za otvaranje stečajnog postupka stečajni dužnik, dostaviti izjašnjenje da li je stečajni dužnik, odnosno organ ovlašten za zastupanje stečajnog dužnika podnio prijedlog za otvaranje stečajnog postupka u roku od 60 dana od dana nastupanja platežne nesposobnosti.

Privremeni stečajni upravnik dužan je podnijeti svoj pismeni izvještaj ovom sudu u roku od 30 dana od dana donošenja ovog rješenja u kome će izvijestiti ovaj sud o preduzetim radnjama i iznijeti svoje stručno mišljenje o tome da li postoje razlozi za otvaranje stečajnog postupka, odnosno da li postoje bilo kakvi izgledi za nastavak daljeg poslovanja dužnika.

Mjere pojedinačnog prinudnog izvršenja pokrenute protiv stečajnog dužnika se obustavljaju, izlučna i razlučna prava povjerioci ne mogu ostvariti u predhodnom postupku, stečajni dužnik ne može raspolagati budućom stečajnom masom bez saglasnosti privremenog stečajnog upravnika i suda, a sve to u cilju osiguranja buduće stečajne mase.

Rješenje će biti objavljeno u „Službenim novinama FBiH“, web stranici Općinskog suda u Tuzli i na Internet stranici FIA-e, te se pozivaju povjerioci da privremenom stečajnom upravniku bez odlaganja dostave prijedlog mjera osiguranja na predmetima stečajnog dužnika koje će eventualno zahtijevati.

Ovo rješenje će se dostaviti Odjeljenju registra ovog Suda, Zemljišno-knjižnom uredu Općinskog suda u Tuzli i Službi za geodetske i imovinsko-pravne poslove Grada Tuzla, radi upisa zabilježbe otvaranja prethodnog postupka.

O b r a z l o ž e n j e

Predlagač – povjerilac Malokas Ranko iz Tuzle, ul. Marašala Tita br. 62, putem punomoćnika Mirsada Božanović i Tatjana Gajić, advokatima iz Tuzle, podnio je dana 15.07.2024.godine ovom sudu prijedlog za otvaranje stečajnog postupka nad privrednim društvom „DD „IDAC“ u mješovitoj svojini Tuzla, zbog platežne nesposobnosti stečajnog dužnika jer isti ne posluje duži vremenski period.

Stečajni sudija nakon što je utvrdio da je prijedlog za pokretanje stečajnog postupka podnesen od strane ovlaštenog predlagača u smislu odredbe člana 58. stav 1. i 2. Zakona o stečaju i da je isti dopušten, zakazao je ročište za saslušanje povjerioca kao podnosioca prijedloga i dužnika.

Na ročištu održanom dana 28.08.2024.godine, punomoćnik predlagača je izjavio da ostaje kod prijedloga za otvaranje stečajnog postupka, te napomenuo da društvo nema JIB, da nema otvoren račun niti u jednoj poslovnoj banci, a poslovanje ne obavlja od 2010.godine, da se dugovanja društva odnose na potraživanja radnika po osnovu izvršnog postupka broj 32 0 I 100673 11 I, ne posjeduje novčana sredstva, ali ima nepokretnu imovinu upisanu u zk izvadcima dostavljenim ovom sudu broj: 14082,2232 i 2221 k.o. Tuzla, te imajući u vidu sve navedeno smatra da su ispunjeni uslovi za pokretanje prethodnog stečajnog postupka. Privremeni zastupnik dužnika je izjavio da se ne protivi prijedlogu da se nad dužnikom DD „IDAC“ u mješovitoj svojini Tuzla pokrene prethodni stečajni postupak radi utvrđivanja uvjeta za otvaranje stečajnog postupka nadd imovinom navedenog dužnika.

Dana 29.08.2024. godine, rješenjem ovog suda, broj gornji, naloženo je predlagaču da uplati novčana sredstva na ime predujma finansiranja troškova prethodnog postupka radi utvrđivanja uslova otvaranja stečajnog postupka.

Predlagač–povjerilac je dana 19.09.2024.godine dostavio sudu dokaz o uplati predujmljenih sredstava za finansiranje prethodnog postupka u iznosu od 10.000,00 KM.

Na osnovu priložene dokumentacije i to: Prijedlog za pokretanje stečajnog postupka od 15.07.2024.godine Presuda Općinskog suda u Tuzli broj P-2310/02 od 04.12.2022. godine, Prijedlog za izvršenje i rješenje broj I.1210/03, Rješenje broj 32 0 I 100673 11 I od 21.11.2014. godine, Rješenje Općinskog suda u Tuzli broj 32 0 I 100673 11 I od 13.05.2020. godine, Podaci iz registra Općinskog suda u Tuzli broj 032-0-RegZ-24-002681 od 01.07.2024. godine, Rješenje o rezultatima revizije prethodno izvršene vlasničke transformacije kod MP IDAC d.d. Tuzla, Zavoda za računovodstvo i reviziju F BiH, Sarajevo broj UP-I-02-325/99 od 10.04.1999. godine, Odluka KAP u TK o odobravanju korigovan početnog bilanca sa listom dioničara broj 03-3064/2004 od 15.10.2004. godine, Obavijest Ministarstva trgovine turizma i saobraćaja broj 05/1-05 -028250-2/15 od 28.01.2016. godine, Odluka o utvrđivanju liste preduzeća prema kojima Općina Tuzla vrši ovlaštenja prava upravljanja po osnovu državnog kapitala broj 01/1-1556/97 od 28.07.1997. godine, Obavijest Kantonalne agencije za privatizaciju broj 01-08-288/2022 od 10.06.2022. godine, Zemljišno knjižni izvadci za zemljišno knjižne uloške broj 14082, 2232 i 2221 svi KO Tuzla II, nalaz vještaka geodetske struke Mile Stanišić od 29.03.2016. godine, Podaci MUP TK od 06.05.2014. godine i MUP KS od 29.04.2014. godine, predlagač je učinio vjerovatnim platežnu nesposobnost dužnika.

Na osnovu podnesene dokumentacije i saslušanja punomoćnika predlagača – povjerioca i privremenog zastupnika protivnika predlagača – dužnika, sud nije u mogućnosti da sam procijeni postojanje svih neophodnih uslova koje Zakon predviđa za otvaranje stečajnog postupka, te se donosi rješenje o pokretanju prethodnog postupka radi utvrđivanja uslova za otvaranje stečajnog postupka nad dužnikom, temeljem odredbe člana 61. stav 1. Zakona o stečaju („Službene novine Federacije BiH“, br.53/2021.).

Odluka iz stava 3. ovog rješenja donesena je temeljem odredbe člana 63. pomenutog zakona, a nakon što je utvrđeno da privremeni stečajni upravnik ispunjava uslove za imenovanje utvrđene odredbom člana 71. istog zakona.

Na osnovu navedenog, temeljem citiranih odredbi zakona, sud je odlučio kao u izreci rješenja.

Stečajni sudija
Antonela Đaković

POUKA O PRAVNOM LIJEKU: Protiv ovog rješenja dozvoljena je žalba u roku od 8 (osam) dana, računajući od petog dana od dana objavljivanja u „Službenim novinama FBiH“. Žalbu mogu uložiti stečajni dužnik i privremeni stečajni upravnik. Žalba se podnosi Kantonalnom sudu putem ovog Suda.